

GAGASAN JAKIM DALAM PELAKSANAAN PENDEKATAN ISLAM HADHARI DI MALAYSIA

WAN MOHAMAD BIN DATO' SHEIKH ABDUL AZIZ

PENDAHULUAN

Kepimpinan negara yang diterajui oleh YAB Dato' Seri Abdullah bin Haji Ahmad Badawi telah memperkenalkan suatu pendekatan yang dikenali sebagai **Islam Hadhari** pada tahun 2004. Pendekatan ini merupakan satu usaha yang amat penting untuk umat Islam khususnya memahami dan menghayati Islam sebagai sistem kehidupan menyeluruh dan menjadi pembina tamadun. Ini kerana Islam bukanlah agama ritual semata-mata sebaliknya Islam mestilah dihayati sebagai satu sistem yang mengintegrasikan kehidupan duniawi dan persiapan ukhrawi. Hanya dengan cara ini Islam akan dapat dihidharkan bersama-sama setiap aspek kehidupan kita dan bukan pada amalan dan aktiviti tertentu sahaja.

Justeru itu, pendekatan yang bijak dan menyeluruh yang diperkenalkan oleh YAB Dato' Seri Abdullah bin Haji Ahmad Badawi bertujuan untuk membawa rakyat ke arah kehidupan yang lebih terarah dan berjaya serta meletakkan Negara ke persada antarabangsa dengan kekuatan imej yang disegani oleh masyarakat dunia. Beliau ingin supaya cara berfikir rakyat berubah jauh ke hadapan merentasi zaman, kualiti hidup yang sentiasa bertambah baik, sistem pertahanan yang kemas dan setanding dengan orang lain, ekonomi domestik yang kukuh dan berkembang, golongan minoriti mendapat jaminan pembelaan dan hak untuk turut sama menikmati arus pembangunan serta budaya ilmu dan integriti menjadi amalan masyarakat.

Semua ini disatukan dalam satu pendekatan dan disebarkan kepada semua rakyat tanpa mengira agama bangsa dan warna kulit untuk dihayati dan dilaksanakan.

Hasrat tersebut telah dinyatakan oleh Perdana Menteri Malaysia YAB Dato' Seri Abdullah bin Haji Ahmad Badawi ketika perhimpunan Agong UMNO ke-55 di PWTC pada 23 September 2004 iaitu; *"Islam Hadhari memberi penekanan kepada pembangunan-pembangunan yang menjurus kepada pembinaan peradaban. Peradaban yang dicanai dengan pegangan Islam dan memberi fokus kepada usaha mempertingkatkan mutu kehidupan. Mempertingkatkan mutu kehidupan melalui penguasaan ilmu, pembangunan insan, pembangunan kesihatan serta pembangunan fizikal. Mempertingkatkan mutu kehidupan dengan mengamalkan sistem ekonomi, sistem perdagangan dan sistem kewangan yang dinamik."*

LATAR BELAKANG

Malaysia mencapai kemerdekaan daripada penjajahan Inggeris pada 31 Ogos 1957. Tunku Abdul Rahman Putra, Perdana Menteri pertama Malaysia, sebagai seorang Melayu beragama Islam, telah berjaya meyakinkan para pejuang kemerdekaan yang terdiri daripada kaum Cina dan India untuk memasukkan satu peruntukan dalam Perlembagaan tentang Islam sebagai agama rasmi Persekutuan dan agama-agama lain boleh diamalkan dengan aman dan harmoni.

Peringkat awal program keagamaan yang dijalankan dalam Negara merdeka, pada umumnya merupakan aktiviti yang lebih menekankan tentang ritual, seperti Majlis Tilawah al-Quran Peringkat Kebangsaan dan Antarabangsa dan menekankan lebih kepada aspek memperkasakan fardu ain.

Usaha meningkatkan dakwah dan syiar agama Islam ini diteruskan oleh Perdana Menteri Malaysia seterusnya secara lebih meluas, merangkumi usaha memasukkan pelajaran agama ke dalam arus perdana Dasar Pendidikan Negara, penubuhan badan yang mentadbir hal ehwal Islam malah penubuhan badan urusan haji dan sokongan kepada badan-badan dakwah. Penubuhan badan-badan tersebut telah menjadi teras kepada perkembangan Islam di Malaysia melalui bidang pendidikan, ekonomi dan dakwah.

KENAPA PENDEKATAN ISLAM HADHARI DIPERKENALKAN

Walaupun di bawah kepimpinan empat Perdana Menteri Malaysia terdahulu telah berjaya membawa Malaysia ke arah sebuah negara maju dan dijadikan contoh oleh negara Islam yang lain namun situasi luar daripada Malaysia, dunia Islam

dan umatnya masa kini sering dilabelkan oleh masyarakat antarabangsa sebagai pengganas, militan, miskin dan mundur.

Ini kerana setelah sekian lama Negara-negara umat Islam dijajah oleh barat, kebanyakan dari kalangan alim ulama serta para cendekiawan di Negara tersebut hanya melihat ketamadunan Islam dari sudut akidah dan ibadah semata mata. Mereka lebih suka membahaskan perkara-perkara *furu'* dan *khilafiah* yang akhirnya umat Islam berpecah sesama sendiri dan berlaku peperangan saudara. Sehingga kini tiada sebuah Negara umat Islam pun yang benar-benar mampu membuktikan bahawa umat Islam sebagai "*khaira ummah*".

Disebabkan Negara-negara umat Islam dipandang hina dan rendah oleh negara-negara bukan Islam atas kelemahan dari sudut penguasaan ilmu pengetahuan dan juga kemunduran dalam aspek pembangunan, maka Malaysia telah mengambil inisiatif untuk membangunkan dan mengembalikan semula ketamadunan umat berasaskan Pendekatan Islam Hadhari.

Pengumuman oleh YAB Dato' Seri Abdullah Ahmad Badawi, Perdana Menteri Malaysia kelima untuk melaksanakan pengurusan dan pembangunan Malaysia berasaskan kepada Pendekatan Islam Hadhari pada masa ini amat bertepatan dalam usaha Malaysia menjadi sebuah Negara Islam maju mengikut acuan sendiri menjelang 2020.

DEFINISI, MISI, VISI DAN OBJEKTIF PENDEKATAN ISLAM HADHARI

Dari segi istilah, perkataan "*hadhari*" membawa maksud "*yang bertamadun*" atau "*Islam yang menekankan aspek tamadun*". Dalam bahasa Inggeris disebut sebagai "*Civilizational Islam*", dan dalam bahasa Arab sebagai "*al-Islam al-Hadhari*".

Dari segi pentakrifan pula Islam Hadhari secara lengkap ialah: "*Suatu pendekatan pembangunan manusia, masyarakat dan negara Malaysia yang bersifat menyeluruh berdasarkan kepada perspektif tamadun Islam*".

Dari definisi tersebut dapatlah diuraikan bahawa Islam Hadhari bermaksud;

- a. Pendekatan Islam Hadhari diperkenalkan kerana ia lebih lengkap dan menyeluruh berbanding pendekatan Islam secara *juz'i* atau terpisah-pisah seperti Islam bersifat politik (*Islam al-Siyasi*), Islam bersifat tasawuf (*Islam al-Sufi*) dan seumpamanya.

- b. **Islam Hadhari membawa maksud ajaran Islam yang membawa fokus kepada kehidupan untuk meningkatkan kualiti hidup masyarakat bertamadun dan mempunyai peradaban yang unggul bagi menghadapi cabaran alaf baru seperti ledakan maklumat, dunia tanpa sempadan, ekonomi global, budaya meterialisme, krisis identiti, jati diri serta penjajahan pemikiran.**
- c. **Pendekatan Islam Hadhari tidak menolak pentingnya aspek ritual dalam pembinaan tamadun. Ini kerana pandangan hidup, sistem nilai, kestabilan jiwa dan kemajuan rohaniah merupakan tonggak kepada pembinaan tamadun yang luhur.**

Dari segi istilah, perkataan “hadhari” membawa maksud “yang bertamadun” atau “Islam yang menekankan aspek tamadun”. Dalam bahasa Inggeris disebut sebagai “Civilizational Islam”, dan dalam bahasa Arab sebagai “*al-Islam al-Hadhari*”.

VISI

Visi Islam Hadhari adalah “untuk menjadikan Malaysia sebagai sebuah Negara Islam Contoh, iaitu sebuah negara maju mengikut acuan sendiri”.

Konsepnya ialah negara yang mempunyai masyarakat membangun dan memiliki ilmu, berkemahiran dan berketrampilan serta tergambar sebagai golongan yang berakhlak, berbudi dan berbudaya yang berpaksikan kepada kepercayaan Agama.

MISI

Misi Pendekatan Islam Hadhari ialah; “Melaksanakan agenda pembangunan negara dan ummah berlandaskan pendekatan Islam yang universal, maju, bertamadun, bertoleransi dan berimbang”.

OBJEKTIF

Objektif Pendekatan Islam Hadhari adalah; “Melahirkan individu dan masyarakat yang mempunyai kekuatan spiritual (rohani), akhlak, intelektual, material, mampu berdikari, berdaya saing, melihat ke hadapan,

inovatif serta cekap menangani cabaran-cabaran semasa secara bijaksana, rasional, praktikal dan damai”.

Berdasarkan kepada definisi, visi, misi dan objektif tersebut jelaslah bahawa Islam Hadhari merupakan satu konsep pendekatan yang komprehensif bagi memacu kemajuan kehidupan manusia. Pendekatan Islam Hadhari memartabatkan hubungan manusia dengan Penciptanya, manusia dengan manusia, manusia dengan makhluk dan manusia dengan alam sekitarnya.

JAKIM SEBAGAI URUSETIA INDUK PELAKSANAN PENDEKATAN ISLAM HADHARI

Dalam Mesyuarat Jemaah Menteri pada 27 Oktober 2004 telah dipersetujui bahawa tugas penyelarasan pelaksanaan Pendekatan Islam Hadhari dipertanggungjawabkan kepada YB Dato' Dr. Abdullah bin Md Zin, Menteri di Jabatan Perdana Menteri yang pada ketika itu tugas ini diserahkan kepada Jabatan Kemajuan Islam Malaysia (JAKIM).

Ekoran daripada itu dalam Mesyuarat Majlis Kebangsaan Bagi Hal Ehwal Ugama Islam yang dipengerusikan oleh YAB Perdana Menteri kali ke-44, satu kertas dasar mengenai Pendekatan Islam Hadhari telah dibentangkan oleh Ketua Pengarah JAKIM. Antara keputusan yang telah dicapai dalam mesyuarat tersebut adalah;

- i. Menentukan mekanisma Pelaksanaan Pendekatan Islam Hadhari
- ii. Pembahagian tugas memberi penjelasan Pendekatan Islam Hadhari kepada 8 Agensi iaitu JAKIM, Pejabat Penasihat Agama Kepada YAB Perdana Menteri, JAPIM, JASA, YADIM, IKIM, JPT dan KAGAT.

Bagi memudahkan kefahaman dan hala tuju mengenai Pendekatan Islam Hadhari maka YB Menteri di Jabatan Perdana Menteri telah melantik sekumpulan Panel Pemikir yang terdiri daripada 30 orang tokoh akademik dan profesional dalam pelbagai bidang (aspek fardhu ain dan fardhu kifayah) membantu JAKIM menggubal konsep Pendekatan Islam Hadhari.

Sebuah sekretariat ad-hoc telah ditubuhkan di Bahagian Penyelidikan JAKIM untuk melaksanakan tugas ini. Melalui sekretariat ini satu bengkel penyediaan dokumen bertulis mengenai konsep dalam Pendekatan Islam Hadhari telah diadakan. Dokumen tersebut telah dibukukan bertajuk

Islam Hadhari; Satu Penjelasan dan ia telah dicetak dalam beberapa bahasa suku kaum rakyat Malaysia dan diedar ke seluruh negara bagi menjelaskan tentang konsep Pendekatan Islam Hadhari. Sekretariat ini kemudiannya dipindahkan ke Bahagian Dakwah pada April 2005 dengan penubuhan Cawangan Islam Hadhari dan Penerapan Nilai-Nilai Islam sebagai Urusetia tetap pelaksanaan Pendekatan Islam Hadhari.

Sejak daripada itu JAKIM dengan kerjasama 8 Agensi tersebut telah berusaha keras mempromosi dan melaksana program penjelasan Pendekatan Islam Hadhari di seluruh negara. Secara umum tahap perkembangan Pendekatan Islam Hadhari adalah seperti berikut;

- i. Tahun 2004 sebagai tahun pelancaran Pendekatan Islam Hadhari.
- ii. Tahun 2005 sebagai tahun penjelasan Pendekatan Islam Hadhari, dan;
- iii. Tahun 2006 merupakan tahun bermulanya pelaksanaan Pendekatan Islam Hadhari.

PENYEDIAAN PERANCANGAN STRATEGIK 5 TAHUN PENDEKATAN ISLAM HADHARI

JAKIM sebagai agensi penyelaras Pendekatan Islam Hadhari peringkat kebangsaan sedang berusaha supaya pengisian Pendekatan Islam Hadhari dapat dirancang dan dilaksanakan secara menyeluruh oleh semua kementerian dan agensi kerajaan di peringkat Persekutuan dan negeri. Tanpa pengisian yang sewajarnya, Pendekatan Islam Hadhari yang diperkenalkan oleh kepimpinan Negara akan hanya menjadi falsafah yang tidak memberi apa-apa makna.

Oleh itu menjelang tahun 2006, JAKIM telah menggubal perancangan strategik Pendekatan Islam Hadhari bagi tempoh 5 tahun (2006 - 2010) untuk dilaksanakan oleh setiap Kementerian dan agensi Kerajaan di peringkat Persekutuan dan negeri. Perancangan strategik tersebut digubal bersama oleh sebuah Jawatankuasa khas yang diwakili oleh pelbagai kementerian dan agensi. Perancangan Strategik 5 Tahun Islam Hadhari ini telah dijadikan dokumen induk pelaksanaan Pendekatan Islam Hadhari. Semua agensi kerajaan, badan berkanun, sektor korporat dan badan-badan bukan kerajaan (NGO) di peringkat pusat, negeri dan daerah akan menjadikannya sebagai panduan untuk bersama-sama membangunkan Negara melalui Pendekatan Islam Hadhari. Pihak MAMPU dan ICU telah menjadi perunding dan penasihat kepada penyediaan perancangan strategik tersebut.

Perancangan ini diselaraskan dengan RMK9 dan dasar-dasar sedia ada yang sedang dilaksanakan oleh kerajaan seperti Pelan Integriti Nasional (PIN) dan sebagainya. Antara petikan ucapan YAB Perdana Menteri ketika membentangkan membentangkan usul mengenai rancangan Malaysia kesembilan, 2006-2010 di Dewan Rakyat pada 31 Mac 2006 ialah ; **“Kita mahu negara menjadi negara maju, dengan ciri-ciri tersendiri. Kita mahu kemajuan yang bersifat holistik, merangkumi kesemua sembilan cabaran yang terkandung dalam Wawasan 2020. Kita mahu kemajuan yang dapat dinikmati semua, secara saksama tanpa mengira agama atau kaum. Kita mahu membina tamadun negara, seiring dengan kecemerlangan tamadun Islam dan tamadun-tamadun lain, selaras dengan Pendekatan Islam Hadhari.**

Dokumen perancangan strategik tersebut kemudiannya dibentang dan diluluskan dalam Mesyuarat Jawatankuasa Penyelarasan Pendekatan Islam Hadhari Peringkat Kebangsaan yang dianggotai oleh Ketua-ketua Setiausaha Kementerian. Manakala bagi peringkat negeri, penyediaan perancangan strategik 5 Tahun Pendekatan Islam Hadhari dilakukan bersama-sama antara pihak Jabatan Agama Islam Negeri dengan Setiausaha Kerajaan Negeri.

Melalui strategi yang dirancang, Pendekatan Islam Hadhari akan membentuk dan membangun warga Malaysia dengan cara yang dirancang, menghadirkan nilai-nilai Islam dan menepati 10 Prinsip Pendekatan Islam Hadhari. Ketika merancang dan mengatur perancangan strategik tersebut semua isu atau punca permasalahan yang berlaku dalam masyarakat telah dikenalpasti. JAKIM turut merujuk kepada ajaran al-Quran dan hadis serta menyelusuri kaedah-kaedah syarak. Lantas Pendekatan Islam Hadhari bukanlah ajaran baru atau mazhab baru seperti mana yang telah disalah mengertikan oleh golongan tertentu.

Pendekatan Islam Hadhari dalam konteks membangunkan masyarakat memerlukan strategi. Ini mustahak kerana melalui strategi, 10 prinsip Pendekatan Islam Hadhari dapat diterjemahkan ke dalam kehidupan masyarakat.

Sebagai contoh; apabila kita melihat masyarakat miskin maka apakah strategi Pendekatan Islam Hadhari untuk memperbaiki kehidupan mereka. Untuk menjadikan perancangan strategik Pendekatan Islam Hadhari berjaya maka pembasmian kemiskinan masyarakat secara lebih menyeluruh perlu dilakukan. Pendekatan Islam Hadhari melihat masalah kemiskinan sebagai masalah masyarakat dan ia berkaitan dengan kualiti hidup masyarakat.

Melalui perancangan strategik tersebut agensi-agensi kerajaan telah merangka program latihan dan kemahiran untuk golongan ini. Program

industri kelompok umpamanya boleh dijayakan bagi memajukan rakyat miskin sama ada di bandar ataupun di luar bandar. Sementara pelaksanaan program bantuan perumahan bagi golongan berpendapatan rendah diperluas termasuk memberi peluang kepada golongan fakir di kawasan bandar menikmati kemudahan tempat tinggal yang akan dijadikan asas untuk mereka berusaha membina kehidupan yang lebih berkualiti.

Demikian juga pelaksanaan Pendekatan Islam Hadhari dalam meningkatkan penguasaan ilmu di kalangan masyarakat. Melalui prinsip ke-4, **Penguasaan Ilmu Pengetahuan**, beberapa strategi telah digubal oleh JAKIM bersama-sama Kementerian dan agensi yang berkaitan. Tujuannya bagi mempertingkatkan usaha penguasaan ilmu secara meluas, berterusan dan mengintegrasikan antara ilmu fardhu ain yang juga dikenali sebagai ilmu mengurus diri dengan ilmu fardhu kifayah yang juga dikenali sebagai ilmu mengurus sistem dalam masyarakat. Melalui pengintegrasian ilmu ini maka modal insan akan dapat diwujudkan seterusnya memastikan rakyat yang berminda kelas pertama berkembang seiring dengan pembangunan negara.

Dalam konteks pelaksanaan prinsip yang pertama iaitu meningkatkan keimanan dan ketakwaan kepada Allah, Jabatan Kemajuan Islam Malaysia (JAKIM) memberi penekanan kepada aspek pembinaan iman dan syahsiah Insan di kalangan pegawai dan kakitangan awam. Untuk itu kursus-kursus berkaitan Pendekatan Islam Hadhari di Kementerian telah dilaksanakan melalui kerjasama JAKIM. Taklimat-taklimat berkenaan Pendekatan Islam Hadhari juga telah dilaksanakan di Kementerian seperti mengadakan **Kursus Bina Insan, Kursus Bina Taqwa dan Kursus Tasawwur Islam** berdasarkan modul yang telah disediakan oleh JAKIM. Bagi memantapkan lagi pelaksanaan kursus tersebut maka **Kursus Bina Insan, Kursus Bina Taqwa dan Kursus Tasawwur Islam berdasarkan Prinsip Pertama Islam Hadhari** akan ditawarkan di pusat-pusat latihan JAKIM iaitu di ILIM bagi Semenanjung, di Pusat Latihan Dakwah Kundasang (bagi Zon Sabah), dan Pusat Latihan Sarawak (bagi Zon Sarawak). Dengan cara ini JAKIM berharap banyak lagi anggota perkhidmatan awam dapat menjalani kursus-kursus berkaitan Pendekatan Islam Hadhari.

PENUBUHAN BAHAGIAN HADHARI DAN PEMBANGUNAN INSAN, JAKIM

Sejarah penubuhan Bahagian Hadhari dan Pembangunan Insan bermula dari sebuah sekretariat ad-hoc yang ditubuhkan di Bahagian Penyelidikan JAKIM pada awal 2004. Selepas itu sekretariat ini dipindahkan ke Bahagian Dakwah dengan menggunakan nama yang sama sebelum Jabatan Perkhidmatan Awam (JPA) meluluskan sekretariat ini sebagai cawangan dengan digabungkan bersama

Cawangan Penerapan Nilai-Nilai Islam dan diketuai oleh seorang Ketua Penolong Pengarah. Memandangkan kepada tugasnya yang perlu kepada penumpuan dan semakin mencabar, pada Oktober 2007 pihak pengurusan tertinggi JAKIM telah bersetuju agar Cawangan Hadhari dan Penerapan Nilai-Nilai Islam dipisahkan dari Bahagian Dakwah secara pentadbiran dan menjadi sebuah bahagian baru dengan nama Bahagian Hadhari dan Pembangunan Insan serta diketuai oleh seorang Pengarah Bahagian.

Melalui penubuhan Bahagian tersebut usaha JAKIM meningkatkan peranannya melaksanakan Pendekatan Islam Hadhari akan dapat dilaksanakan dengan jayanya. Selain daripada itu usaha JAKIM untuk melaksanakan dakwah "*bil hal*" dapat dilakukan dengan cara yang lebih tersusun.

HALATUJU DAN PERLAKSANAAN ISLAM HADHARI 2006-2010; STRATEGIK DAN PROGRAM YANG BERTERUSAN

Pembangunan berasaskan modal Insan yang ingin dilaksanakan melalui Pendekatan Islam Hadhari tidak mudah untuk dicapai dalam jangka masa yang singkat. Ia melibatkan proses perubahan sikap dan budaya yang akan menyumbang kepada pengukuhan nilai-nilai ketamadunan dalam kehidupan seharian. Untuk itu antara program yang akan diteruskan oleh JAKIM adalah meliputi program seperti berikut;

i) Memperluas Penjelasan Pendekatan Islam Hadhari Kepada Masyarakat

Tahun 2006 merupakan bermulanya tahun Pelaksanaan Pendekatan Islam Hadhari namun program penjelasan Pendekatan Islam Hadhari tetap diteruskan. Agensi-agensi pelaksana di peringkat Persekutuan dan negeri telah diminta memberi tumpuan yang lebih mendalam terhadap penghayatan 10 prinsip Pendekatan Islam Hadhari dalam bentuk seminar dan bengkel. Kedua-dua program ini memberi peluang yang lebih luas kepada para peserta untuk memahami Pendekatan Islam Hadhari secara lebih berkesan melalui proses interaksi dalam perbincangan.

Bagi menjayakan program ini, pelbagai agensi kerajaan, badan berkanun, sektor korporat dan badan-badan bukan kerajaan (NGO) disarankan supaya turut mengambil bahagian bagi menjelaskan kefahaman masyarakat mengenai Pendekatan Islam Hadhari, serta melaksanakan penghayatannya melalui institusi masing-masing.

ii) Memperbanyakkan Bahan Rujukan Pendekatan Islam Hadhari

JAKIM berusaha mendokumentasikan segala hasil penulisan, kajian dan kertas kerja yang berkaitan dengan isu-isu yang menjelaskan tentang konsep Pendekatan Islam Hadhari. Bagi tujuan ini, penerbitan Jurnal Hadhari telah dilaksanakan melalui hasil penulisan dan kajian daripada ahli-ahli akademik. Jurnal tersebut akan menghuraikan segala aspek yang berkaitan 10 prinsip yang terdapat dalam Pendekatan Islam Hadhari. Selain daripada itu JAKIM turut menerbitkan Buletin Hadhari yang memuatkan aktiviti dan laporan berkaitan program hadhari yang dilaksanakan oleh JAKIM, Agensi Pelaksana Pendekatan dan Kementerian-kementerian. Penerbitan Buletin tersebut dapat dimanfaatkan oleh seluruh masyarakat sebagai satu bahan bacaan dan rujukan dan JAKIM dipertanggungjawabkan untuk menjelaskan Pendekatan Islam Hadhari agar dapat dilaksanakan dengan jayanya.

JAKIM juga melihat Pendekatan Islam Hadhari perlu bergerak lebih ke hadapan melalui penghasilan buku yang ditulis oleh para ilmuan Islam luar negara yang tersohor. Melalui penulisan oleh ilmuan tersebut Pendekatan Islam Hadhari akan dapat dilihat dari aspek yang lebih luas iaitu dari sudut kaca mata ilmuan luar negara yang mempunyai autoriti dalam hal yang berkaitan dengan bidang ilmuan Islam terutama yang memberi fokus kepada pembangunan Islam secara global.

Harapan JAKIM hasil penulisan tersebut dapat dijadikan bahan rujukan utama bagi pelajar-para institut pengajian tinggi dan dapat dijadikan rujukan masyarakat untuk melihat Pendekatan Islam Hadhari dari perspektif ilmuan Islam luar negara.

iii) Pemantauan

Bagi memastikan Pendekatan Islam Hadhari dilaksanakan dengan jayanya dalam sistem pentadbiran negara maka mekanisma pemantauan turut dilaksanakan. Antaranya ialah melalui mesyuarat-mesyuarat berkala bersama Pihak Kementerian.

Bagi tujuan ini, JAKIM terus memantau dan menyelaraskan pelaksanaannya di peringkat induk iaitu peringkat Kementerian. Manakala pemantauan di peringkat Jabatan agensi-agensi di bawah kementerian akan dipantau sendiri oleh Jawatankuasa Pelaksanaan Pendekatan Islam Hadhari di Kementerian masing-masing. Bagi memastikan usaha ini dapat dilaksanakan dengan jayanya, JAKIM akan sentiasa mendapatkan kerjasama dan nasihat

daripada pihak MAMPU, Jabatan Perdana Menteri seterusnya memastikan tindakan susulan dapat dilakukan dengan cara terancang dan sistematik.

iv) Kajian

JAKIM juga telah melaksanakan kajian kefahaman masyarakat awam terhadap Pendekatan tersebut. Ini disebabkan setelah hampir tiga tahun Pendekatan ini diperkenal dan dilaksanakan, tidak semua masyarakat benar-benar mengetahui dan memahaminya. Jika keadaan ini dibiarkan akan menggagalkan usaha melaksanakan perubahan di kalangan rakyat. Justeru, kajian perlu dilaksanakan untuk menilai tahap kefahaman dan penerimaan masyarakat terhadap Pendekatan Islam Hadhari. Melalui kajian tersebut pada tahun 2007 JAKIM mengenalpasti bahawa 84% masyarakat pada umumnya memahami dan menerima Pendekatan Islam Hadhari.

iv) Pegawai Khas Bagi Pelaksanaan Program Islam Hadhari di Kementerian, Jabatan dan Negeri

Mulai 1 Mei 2008 JAKIM menempatkan 100 kader 100 Pegawai Hal Ehwal Islam (PHEI) di 27 kementerian, bagi membantu menyelaras pelaksanaan Pendekatan Islam Hadhari. Ia sebagai usaha untuk memperluas lagi aktiviti penghayatan Islam dan nilai-nilai murni dalam sektor perkhidmatan awam. Ia juga dapat membantu Kementerian, Jabatan dan Negeri menyemarakkan lagi pelaksanaan Pendekatan Islam Hadhari di negara ini dengan lebih berkesan dan menyeluruh.

Hasrat JAKIM tersebut terlaksana apabila buat peringkat permulaan Jabatan Perkhidmatan Awam (JPA) telah meluluskan 56 perjawatan kader skim Perkhidmatan Hal Ehwal Islam (PHEI) pelbagai gred. Kumpulan pegawai kader tersebut ditempatkan sebagai penyelaras kepada pelaksanaan Pendekatan Islam Hadhari, Dasar Penerapan Nilai-Nilai Islam dan Pengukuhan Integriti Perkhidmatan Awam di semua kementerian, dan negeri.

PENUTUP

Peranan JAKIM dalam pelaksanaan Pendekatan Islam Hadhari adalah sebagai usaha membantu Kerajaan untuk mentamadunkan kehidupan masyarakat. Dengan adanya perancangan yang tersusun, pihak JAKIM berkeyakinan bahawa pelaksanaan Pendekatan Islam Hadhari akan dapat dilaksanakan dengan jayanya, khususnya bagi tahap 5 tahun pertama (2006 – 2010). Justeru pelbagai program yang disusun dan dilaksanakan oleh JAKIM memerlukan sokongan pelbagai pihak kerana ia bukan sahaja ditujukan kepada masyarakat Islam malah termasuk juga kepada masyarakat bukan Islam. Ini disebabkan bersandarkan kepada program semata-mata belum tentu akan menjamin kejayaan Pelaksanaan Pendekatan tersebut. Malah lebih daripada itu kejayaannya turut bergantung kepada sejauh mana kefahaman masyarakat terhadap hasrat kerajaan dan tanggung jawab inilah yang akan di laksanakan oleh JAKIM sebagai satu amanah untuk pembangunan negara dan bangsa.

Dato' Wan Mohamad bin Dato' Sheikh Abdul Aziz
Ketua Pengarah
Jabatan Kemajuan Islam Malaysia (JAKIM)